

Акафист святой великомученице Екатерине

Небесной покровительнице Екатеринбурга



Святая великомученица Екатерина

Акафист

*Празднование
7 декабря*



Информационно-издательский центр
Екатеринбургской епархии
Екатеринбург, 2010

Издается по благословению
архиепископа Екатеринбургского
и Верхотурского Викентия

В память
о принесении в Екатеринбург
Святых Мощей великомученицы
Екатерины. Декабрь 2010 года

Содержание

Акафист святой великомученице Екатерине	3
Молитвы святой великомученице Екатерине	19
Тропарь святой великомученице Екатерине	22

Кондак 1

Избранную и венчанную деву мученицу, невесту Христову Екатерину, похвальными песнями воспоим, яко преславную мучителя победительницу и премудрую философов наставницу: ты же, великомученице Екатерино, имущи дерзновение ко Господу, приклони милостивне к благопотребным прошениям зовущих ти: Радуйся, Екатерино, невесто Христова премудрая.

Икос 1

Ангелом равную чистоту имущи, святая дево Екатерино, с ангелы Божественнаго озарения сподобилася еси, с ними же воспевающи Трисвятую песнь, услыши нас, поющих тебе на земли сия: Радуйся, честное святыни жилище; радуйся, чудесное знамение сбывшагося на тебе Божия Промысла. Радуйся, благоволения Отча сосуде; радуйся, страданий Христовых исполнение. Радуйся, чистое Духа Святаго обиталище; радуйся, светом благочестивыя веры

просветившаяся. Радуйся, святою купелию
отрожденная; радуйся, измывшая ризы
своя в Крови Агнчей на земли. Радуйся, ли-
кующая со священными девами на небеси.
Радуйся, Екатерино, невесто Христова пре-
мудрая.

Кондак 2

Ридящи Екатерина себе видения сподобль-
шуюся, тече к святому старцу, икону ей
Богоматере прежде того вручившему, и по-
веда ему, како отвращаше лице Свое ей яви-
выйся с Пречистою Своею Материею Хри-
стос, како безумну и нищу и худородну ю
нарек, дондеже не оставит идольскаго не-
честия. Преподобный же, слышав сие, на-
стави ю в таинствах веры и крести ю. Она
же во обновлении духа благодарно пояше
Богу: Аллилуия.

Икос 2

Разум благий, благородство истинное,
богатство негиблющее стяжавши в ду-
ховном отрощении, святая Екатерина до-
стойна явися Небеснаго Жениха Христа,

Иже, паки явився ей, возлюблю и дарованным перстнем в невесту Себе обручи. Она же, познавши такое к ней благоволение Божие, тако уязвися любовью Его, яко не мудрствоваше более о земных вещах, но о Возлюбленном своем неперестанно мысляше. Таковой благодати сподобльшаяся, слыши от нас: Радуйся, зловоние мирское возненавидевшая; радуйся, в воню мира Христова текущая. Радуйся, добрая любительнице Жениха Безсмертного; радуйся, сокровище благоволения Вышняго. Радуйся, деннице пресветлая; радуйся, луна совершенная. Радуйся, маслино, в дому Божии насажденная; радуйся, кедре в Ливане высокорасленный. Радуйся, Екатерино, невесто Христова премудрая.

Кондак 3

Сила Вышняго даде тогда святей Екатерине дерзновение, еже нечествующаго царя Максимиана о принесении идолом жертв обличити небоязненно, и той пребысть безгласен на мног час, не могый противити-

ся ея глаголам. Она же, благодарящи Бога, воспеваше: Аллилуия.

Икос 3

Имущи святая Екатерина свыше данную ей премудрость, егда нечестивый царь, постави пред собою, вопрошаше ю о роде ея и сани, она исповеда себе быти дщерь царскую, философския и риторския науки добре изучившую, паче же Христову невесту себе наименова, в явное отвержение идольскаго служения. Радуйся, убо, Екатерине преславная; радуйся, царское священство. Радуйся, пчело, дыма идольскаго отлетевшая; радуйся, голубице, златы крила имущая. Радуйся, кадило Христова благоухания. Радуйся, Екатерино, невесто Христова премудрая.

Кондак 4

Бурею ярости вознеистовився царь на святую деву, рече к ней: «Не глаголи зле о бозех наших». Святая же Екатерина отвеща: «Аще восхощеши отрясти мрак прелести, уразумееши богов твоих худость и

познаеши истинного Бога, Егоже имя токмо глаголемое, или крест, изобразуемый на воздусе, прогоняет боги твоя и погубляет. И аще повелиши, явлю тебе истину, поющи Богу: Аллилуия».

Икос 4

Слышав нечестивый царь свободный и мудрый ответ твой о вере Христовой, убо явися, да не будет побежден от тебе, собра от пределов державы своя мудрецов, числом пятьдесят, на прение. Ты же, Архангелом Михаилом утвержденная и о победе уверенная, возрадовалася еси вступить в прение с ними. Приими убо, дево, от нас похвалу сию: Радуйся, изъяснительнице ума Христова; радуйся, херувимское стяжавшая Богопознание. Радуйся, серафимскою воспаленная к Богу любовию; радуйся, мудрых мудрейшая. Радуйся, духовный меч на неверие изострившая; радуйся, нечестия прогонительнице. Радуйся, верных наставнице. Радуйся, Екатерино, невесто Христова премудрая.

Кондак 5

Боготечной звезде была еси подобна, Екатерина, препревши пятьдесят ветий и наставивши их на путь христианский, ведущий к праведному Солнцу, от Девы возсиявшему Христу Богу, своими мудрыми глаголы, иже и осуждени бывше за Христа на сожжение и напутствовани молитвою твоею, с радостию идоша в огонь, поюще: Аллилуия.

Икос 5

Видев царюющий повеления своя в тебе пренебреженны и увещания презренны, обратился к лукавству, еже ласканием прельстити тя, обещая полцарства тебе дати. Ты же веру сокровищам земным предпочеши и Жениха Христа возлюбивши паче земнаго царства и одежду мученичества паче багряницы, отвергла еси его суесловие. Сего ради воспоем ти сия похвальная: Радуйся, дево, лесь обличившая; радуйся, запинателя змия поправшая. Радуйся, дочь царева; радуйся, дево, рясны зла-

тыми одетая. Радуйся, всякое вещество превозшедшая; радуйся, на гору боговидения востекшая. Радуйся, светом богопознания просвещенная; радуйся, труба духа, воспевающая глас истинного богословия. Радуйся, доброе веры исповедание; радуйся, света евангельского сияние. Радуйся, законов вечных хранительнице; радуйся, наша помощнице. Радуйся, Екатерино, невесто Христова премудрая.

Кондак 6

Проповедником богоносным, апостолом поревновавши, дерзновенно пред лицом мучителя проповедала еси Христа, истинного Бога, Ему же в ранах и в темнице пела еси: Аллилуия.

Икос 6

Бозсиявый в сердце твоём свет истинного богоразумия отгнал есть мрак скорбей, иже не остави тя алкати, голубицею пищу ти посылая, ниже стужати о болезни, посетил бо Сам ты в темнице, ободряя и многи венцы обещава. Ты же, терпели-

водушная, сим паче укрепила еси и царицу Августу и воеводу Порфириа, с воины притекших к тебе, обратила еси к свету веры Христовой и научила пети тебе сия: Радуйся, мироположнице Божественная любве; радуйся, адаманте крепкий. Радуйся, вина чудес неизреченных; радуйся, врага терпением убившая. Радуйся, язвы Господа на теле своем носившая; радуйся, царице Августе с пришедшими к мученическому подвигу путенаставнице. Радуйся, яко во тьме свет была еси; радуйся, яко Сам Господь, Свет мира, тебе, в темнице бывшей, Себе явил есть. Радуйся, уз греховных скорая решительнице; радуйся, болезнующих скорая целебнице. Радуйся, помощнице нашего спасения. Радуйся, Екатерино, невесто Христова премудрая.

Кондак 7

Хотящу безбожному царю привести тя к мерзкому идолослужению, паки сети подстилает тебе, премудрая, еже уловити тя лестно похвалою красоты твоея; ты же красоту вещь привременну и скоропреходну

именовала еси, Христа же исповедала еси
Бога жива и истинна и пела ему: Аллилуия.

Икос 7

Новую показа царь ярость и безчеловечие, повелев епарху колесами растерзати девственное, чистое и святое тело твое, но чудесно рукою ангела абие разрешена была еси безвредна и колеса на части сокрушены, имиже многи от неверных убиенны, яко удивися сам царь и предстоящий народ, иже и взываше: «Велик Бог христианский». Мы же, чудящиеся сему, взываем тебе: Радуйся, мученице, ангелом честная и говейная; радуйся, слава полков страдальческих. Радуйся, светлая на враги победа; радуйся, страх неверных. Радуйся, сосуде множайших силы Божия; радуйся, радование верных. Радуйся, Екатерино, невесто Христова премудрая.

Кондак 8

Странное славы изменение и за Христа страдание царицы и воеводы с воины видевше, устранимся любве мира и пло-

ти и вперим себе к разумению Бога, Сей бо есть красота, и слава, и венец нам, поющим: Аллилуия.

Икос 8

Весь сладость, весь желание тебе, святая Екатерино, бысть Иисус: сладце бо Его ради горькия муки терпела еси и скипетр, предлагаемый тебе, попрала еси, предзрящи будущее воздаяние. От нас же прими похвальная сия: Радуйся, чистая, чисте Чистаго возлюбившая; радуйся, горлица, Краснаго Жениха в пустыне дольного мира вожделевшая. Радуйся, воню риз Его благоухавшая; радуйся, яко серна на горах ароматских искавшая Рожденнаго прежде холмов вечных. Радуйся, подвиг страдальческий ради любви Христовы совершившая; радуйся, лик мученический Богу приведшая. Радуйся, яко ветии тобою получиша Царство Небесное; радуйся, яко тоеже тобою получитьи чаем. Радуйся, покров и забрало наше. Радуйся, Екатерино, невесто Христова премудрая.

Кондак 9

Все естество ангельское возрадовася радостию, зря тя, Екатерино, победивши миродержца, шествующую к премирным яко победоносную воеводу, в последовании полка страдальческого, и воспе победная, взывая: Аллилуия.

Икос 9

Ветия многовещанныя заутишася: не возмогше бо противовещати богодухновенным словесем твоим, молчанием почитают дарования твоя; мы же, немощнии, како можем отверсти уста на хвалы твоя? Однако дерзаем и молим, сподоби, благая, безбедно принести тебе песнь сию: Радуйся, органе Духа Святаго; радуйся, заре неизреченнаго осияния. Радуйся, догматов Божественных пучина; радуйся, хитросте, препревшая философов. Радуйся, чаше премудрости; радуйся, плетения ветий растерзавшая. Радуйся, пленицы греховныя разрешающая. Радуйся, Екатерино, невесто Христова премудрая.

Кондак 10

Гпасти хотящи душу твою, о теле твоём
нерадила еси, Екатерино, и на мечное
усечение, мучителю давшу на то изречение,
ты радостно потекла еси, поющи Святому
Безсмертному: Аллилуия.

Икос 10

Гтена тверда и непреодолима явилася еси
женам, тебе на место усечения прово-
ждающим и с рыданием тя жестокосерду к
себе и безразсудну быти именующим: яко
не пощадила еси сладкаго живота в цвете
юности, яко презрела еси земное предлага-
емое царство и блаженство. Ты же воспре-
тила еси неполезный плач их и суесловие,
текущи скорейше соединитися чрез смерть
со своим Возлюбленным, того ради слы-
шиши: Радуйся, радостно за Главу Церкви
Христа под меч главу свою приклонившая;
радуйся, до конца претерпевшая. Радуйся,
течение добре скончавшая; радуйся, яко
ни скорбию, ни ранами, ни мечем с пути
Христова исповедания не совратилася еси.

Радуйся, яко пламень любви в источнице
крове неугасим соблюдшая; радуйся, муче-
ников красото. Радуйся, крепкое христиан
прибежище. Радуйся, Екатерино, невесто
Христова премудрая.

Кондак 11

Пение похвальное дерзнухом принести
тебе, но оскудевает слово наше и не-
доумевает ум, како глаголати; обаче слово
твое премудрое, многих похитившее от
невежества и идолонечестия, возставля-
ет нас. Дажь нам слово твое, во еже пети
удивльшему на тебе величия Своя Богу:
Аллилуия.

Икос 11

Светоприемную ты свещу, вечным усече-
нием погашенную, но на свещнице не-
беснем пред Престолом Святыя Троицы
поставленную, видевше святии ангели, по-
клонишася Живущему во веки и, получив-
ше от Владыки повеление, девственное тело
твое на горе Синайстей погребоша, да не ви-
димо будет, якоже сама хотела еси, врагом

Господним. Мы же песнь сию возсылаем ти: Радуйся, солнцеобразная дево, на небеса духом возшедшая; радуйся, Сиона Горняго достигшая. Радуйся, венче доброты в руце Господни; радуйся, чаше, от обилия дому Божия черплющая радость. Радуйся, к скинии нерукотворенней, вечней приближившаяся; радуйся, на горе законней почивающая телом. Радуйся, яко тамо видена быша шествия Бога Синаина, Бога Иаковля; радуйся, места боговидения Моисеова одержание. Радуйся, ревности Илины указание; радуйся, купины нескоромой явление. Радуйся, дево, Деве Царице, в ризы позлащенны одеянной, преиспещренной, вследствующая; радуйся, яко тобою Сый воспеваётся посреде дев тимпанниц. Радуйся, яко на тебе велелепота Его; радуйся, Престола Вечнаго предстоятельница. Радуйся, от храма вселенных молитвенники к тебе назирающая; радуйся, кадило молитв Вышнему о нас благоприятное. Радуйся, Екатерино, невесто Христова премудрая.

Кондак 12

Благодать дана тебе от Бога руководствовати к познанию истины Его, в тайне сокровенней, и даяти всем яже к пользе прошения. Темже мы, помраченнии, умиленно просим тя, мудрая дево: просвети умныя наши очи и положи нам к небеси стезю проходну, да поем с тобою ныне и во вся веки Единому Премудрому: Аллилуия.

Икос 12

Поюще крепкия твоя мученическая подвиги, хвалим тя, яко одушевленный сосуд спасения человеков: твоим бо разумом Бог премудрость премудрых века сего погуби; тобою ветий призва в язык свят, в люди обновления, яко тем страдати за Христа. Просвети и нас, благая дево, помраченных, да зовем ти: Радуйся, зеркало Божия мудрости; радуйся, силою Вышняго одеянная. Радуйся, подвижнице, елеем радования умащенная; радуйся, воеводо, полк Божий к вечному величеству предпославшая. Радуйся, во светлости святых вшед-

шая; радуйся, во свете неприступном Живущему в лице пламенных слуг представшая. Радуйся, гром трисвятаго пения гласом своим умножающая; радуйся, неизреченную сладость доброты вкушающая. Радуйся, яко хвала и радование над главою твоею; радуйся, яко вечная слава тебе объемлет. Радуйся, от Триипостаснаго Божества венцем Небеснаго Царствия увенчанная; радуйся, благодати и безконечной славы нам ходатаице. Радуйся, Екатерино, невесто Христова премудрая.

Кондак 13

Святая великомученице Екатерино! Приими сие похвальное пение и избави нас от враг видимых и невидимых и от вечнаго мучения твоим благоприятным ходатайством сохрани, да с тобою присно поем Богу: Аллилуия.

(Этот кондак читается трижды, затем икос 1 и кондак 1).

Молитвы святой великомученице Екатерине

Молитва первая

О святая Екатерино, дево и мученице, истинная Христова невесто! Молим тя чрез особливую благодать, еюже предвари тя Жених твой, Сладчайший Иисус: якоже посрамивши прелести мучителя, мудростию твою пятьдесят ветий победила еси и, напоивши их небесным учением, к свету истинныя веры наставила еси, тако испроси и нам оную Божию мудрость, да и мы, расторгнувшие вся козни адскаго мучителя и презрев мира и плоти соблазны, достойны явимся Божественныя славы и к разширению святых наших Православных веры сосуды достойны соделаемся, и с тобою в небесной скинии Господа и Владыку нашего Иисуса Христа хвалим и прославляем во вся веки. Аминь.

Молитва вторая

О святая дево и мученице Екатерине! Молим тя: призи на бедствия нас, грешных раб Божиих (имена), сотвори нас гор-

няя мудрствовать, а не земная. Поспеши нам молитвами твоими побеждать плотская похотения, к миру пристрастие и козни злых духов, на нас злобно воюющих; да твоим предстательством во дни жития сего свободни явимся от враждебных их нападений и по исходе от воздушных их истязаний. О премудрая дево! Даруй нам вся же к пользе прошения, можеш бо многая испросити у Возлюбленного Жениха твоего, Христа Бога нашего. Мы вемы, яко много может молитва праведнаго, поспешествуемая благодатию Милосердаго Бога, Ему же слава, честь и благодарение всегда, ныне и присно и во веки веков.

Молитва третья

О святая великомученице Екатерино, избранный чистоты сосуде, столпе Православия, надежная предстательнице наша, явившая нам сама выну умоляти тя, подвижнице законная, святая на святей горе свято почивающая! Молим тя: приникши свыше, вонми гласу моления нашего, призри на бедствие рабов твоих, просве-

ти омрачение ума нашего, сотвори нас гор-
няя мудрствовать, а не земная. Поспеши
нам молитвами твоими побеждать плот-
ская похотения, пристрастия к миру и коз-
ни злых духов, на нас злобно воющих:
да твоим предстательством во дни жития
сего свободни будем от враждебных их на-
падений и по исходе от воздушных их ис-
тязаний. О премудрая дево! Даруй нам вся,
яже к пользе прошения: можеш бо многая
испросити у возлюбленного Жениха, Хри-
ста Бога нашего. Мы вемы, яко много мо-
жет молитва праведного, поспешествуемая
благоутробием милосердаго Бога, Ему же
слава, честь и благодарение всегда, ныне и
присно и во веки веков. Аминь.

Тропарь святой великомученице Екатерине

Тропарь, глас 4

Добродетельми, яко лучами солнечными, просветила еси неверных мудрецы: и якоже пресветлая луна ходящим в нощи, неверия тьму отгнала еси, и царицу уверила еси, вкупе же и мучителя обличила еси, богозванная невесто, блаженная Екатерино: желанием востекла еси в небесный чертог, к прекрасному Жениху Христу, и от Него царским венцем венчалася еси: Емуже со ангелы предстоящи, за ны молися, творящая пречестную память твою.

Кондак, глас 2:

Дик честный Божественне, мучениколюбцы, воздвигните ныне, почитающе всемудрую Екатерину: сия бо в тризнищи Христа проповеда, и змия попра, риторов разумы укротивши.

Ин кондак, глас 3:

Битийствующи днесь, Екатерина мученица и витиям обличи умовредную ересь, ангел бо с небесе к той прииде, силу от Вышняго принесе, юже приемши, мужески рече: Христос есть мучеником похвала.

Величание

Беличаем тя, страстотерпице Христова Екатерино, и чтим честное страдание твое, еже за Христа претерпела еси.

Информационно-издательский центр
Екатеринбургской епархии, тел.: 8 (343) 278-96-43
Лицензия ИД 03900 от 02.02.2002

Верстальщик: К. А. Богданов
Корректор: Н. Ю. Алексеева

Тираж 5000 экз.
Подписано в печать 24.11.2010

Отпечатано в типографии Екатеринбургской епархии
(г. Екатеринбург, ул. Репина, 6, тел.: 8 (343) 278-96-42)
e-mail: baibakov@etel.ru
<http://orthodox.etel.ru>

